


**TEZAUUR LITURGIC**  
**18 IANUARIE**

**SLUJBA**  
**SF. IERARH**  
**ILARION IUȘENOV,**  
**EPISCOPIUL**  
**POLTAVEI**



**MOSCOVA, 2000**



# Служба святителю Илариону, епископу Полтавскому

## На малей вечерни

На Господи, возвах: стихирьы, глас 6:

Приидите, чада богобоящиися, / во обитель  
честнаго Креста, / дивнаго во святых своих Бога  
возвеличим, / явившаго нам предстателя  
новаго, / Илариона святителя блаженнаго, / той  
бо ныне Престолу Вседержителю предстоит, //  
моляся о всех нас.

Приидите, священницы, / составим праздник /  
святителю милостивому Илариону, /  
молитвенику новому земли Полтавския, /  
благодати источника прославим, / той бо к  
милосердию всех подвизает, / путь  
спасительный указуя верным, // моляся о всех  
нас.

Приидите, иноков сословие, / ублажим  
предивнаго архипастыря земли Русския, /  
Илариона милостиваго святителя, / память бо  
того днесь нам светло возсия, / от Чертогов  
Небесных, / идеже пребывает ныне, // моляся о  
всех нас.

Слава, глас 6:

Киими въздыханьми прославим Бога, /  
даровавшего нам такового предстателя, / яко  
солнце Богокрасное, / любовь свою  
возсиявшего / на сирья, вдовы и убогия, /  
сердца всех возвеселяя, / на похвалу подвизая  
Господу: / слава Тебе, Семимилостивый Боже, //  
во святых Своих почивающий.

И ныне, Богородичен, глас тойже.

На стиховне стихиры, глас 2.

Подобен: Доме Евфрафов:

Священне Иларионе, / архиерей божественный,  
/ пастырем образ богодарованный, / и людем  
всем предстателю, // прославися днесь  
всечесная память твоя.

Стих: Яко милость Твоя пред очима моима есть,  
/ и благоугодих во истине Твоей.

Церковь Русская / украшается днесь, / иноков  
соборы ликовствуют, / доблестнаго Илариона,  
ублажая, // святителя новаго.

Стих: Милость и истина сретостеса, / правда и  
мир облобызастеса.

Земле Полтавская, / собрание божественное, /  
вонми подвигам святителя твоего, / нищелюбию  
и милости поучаяся, / в них же спасение бысть.

Слава, глас и подобен тойже:  
Святителю отче Иларионе, / иерарше  
милостивый, / молися ко Господу, / о земном  
отечестве твоём, // и о почитающих тя  
любовию.

И ныне, глас и подобен тойже.  
Вкупе со святителем милостивым, / Мати  
Христа Бога, / моли Всемилостиваго Спаса, / о  
мире Твоём, / и о почитающих Тя любовию.

Тропарь святому, глас 3:  
Иерархов образ тихости, / смирения наставниче  
/ и нищих заступниче, / не забуди чад твоих, /  
моля о нас Всещедраго Бога, / святителю  
Христов Иларионе, // милостивый отче наш.

### **На велицей вечерни**

На Господи, возвах: стихирь, глас 3:  
Торжествуй и веселись, Церковь Русская, /  
величая дивныя подвиги святителя Илариона, /  
пастыря милостиваго, / той бо яко поросль, /  
земли Смоленския украшение бысть, /  
Полтавския же земли радость и предстатель  
пред Господем, / Емуже в житии предивно  
потрудился еси, / во едином стаде собирая  
божественныя чада своя, / во образе смиренном  
возносити глас Всемилостивому Спасу: // спаси,

Боже, и помилуй нас.

Торжествуй и веселись, обитель Полтавская, /  
прославляя память святого игумена твоего, /  
Илариона милостиваго святителя, / память бо  
того днесь нам светло возсия, / мрак ненависти  
и призрения к убогим упраздняя, / и всякия  
добродетели научая иноки и мирстии, /  
Христовою любовью собирая всех / пети  
Всемилоствому Спасу: // спаси, Боже, и  
помилуй нас.

Торжествуй и веселись, святителю Христов  
Иларионе, / поминающих тя, предстательством  
своим пред Богом, / в благочестии и чистоте  
соблюди, / и достойно подвигам твоим житие  
наше управи, / да прославляюще пресветлую  
память твою / понесоша бремя скорбей / не в  
жестокосердие впадем, / но по образу твоему /  
милостию и добродетельми к убогим и  
скорбящим / прославим Господа, взывая  
Всемилоствому Спасу: // спаси, Боже, и  
помилуй нас.

Слава, глас 5:

Радостию исполняеми, / притицем, вернии, / к  
честным мощем святителя милостиваго  
Илариона, / молитвенника новаго земли  
Полтавския, / прославляюще богомудрое житие  
того, / нищелюбием обогащенное / и  
добродетельми преисполненное, / блаженнаго

угодника Божия ублажим, / и по образу его  
спасение приобретаем, / славяще и воспевая  
Господа, / сердцем и усты дерзая возносить  
днесь / Всемилостивому Спасу: // спаси, Боже,  
и помилуй нас.

И ныне, глас тойже:

В Чермнем мори, / Неискусобрачныя Невесты  
образ написася иногда: / тамо Моисей,  
разделитель воды, / zde же Гавриил, служитель  
чудесе. / Тогда глубину шествова немокренно  
Израиль; / ныне же Христа роди безсеменно  
Дева. / Море по прошествии Израилеве  
пребыть непроходно; / Непорочная по  
рождестве Эммануилеве пребыть нетленна. /  
Сый и прежде Сый, / явлейся яко Человек, /  
Боже, помилуй нас.

Вход, прокимен дне и чтения три:

Притчей чтение (16, 3-8):

Приблужи ко Господу дела твоя, / и утвердятся  
помышления твоя. / Вся содела Господь себе  
ради: / нечестивии же в день зол погибнут. /  
Нечист пред Богом всяк высокосердый: / в руку  
же руце влагаяй неправедно не обезвинится. /  
Начало пути блага, / еже творити праведная, /  
приятна же пред Богом паче, нежели жрети

жертвы. / Ищай Господа обрящет разум со  
правдою: / праве же ищущии его обрящут мир.

Притчей чтение (3, 1-12):

Сыне, / моих законов не забывай, / глаголы же  
моя да соблюдает твое сердце: / долготу бо  
жития и лета жизни и мир приложат тебе. /  
Милостыни и вера да не оскудевают тебе: /  
обложи же я на твоей выи / и напиши я на  
скрижали сердца твоего: / и обрящеши  
благодать. / И промышляй добрая пред  
Господем (Богом) и человеки. / Буди уповая  
всем сердцем на Бога, / о твоей же премудрости  
не возносятся: / во всех путех твоих познавай ю,  
/ да исправляет пути твоя. / Не буди мудр о  
себе: / бойся же Бога и уклоняйся от всякаго  
зла: / тогда изцеление будет телу твоему / и  
у врачевание костем твоим. / Чти Господа от  
праведных твоих трудов / и начатки давай ему  
от твоих плодов правды: / да исполнятся  
житницы твоя множеством пшеницы, / вино же  
точила твоя да источают. / Сыне, / не  
пренебрегай наказания Господня, / ниже  
ослабевай от него обличаемь: / егоже бо любит  
Господь, наказует, / биет же всякаго сына, /  
егоже приемлет.

Притчей чтение (14, 12-22):

Есть путь, / иже мнится человеком прав быти, /  
последняя же его приходят во дно ада. / Ко  
веселием не примешавается печаль: / последняя  
же радости в плачь приходят. / Путий своих  
насытится дерзосердый, / от размышлений же  
своих муж благ. / Незлобивый веру емлет  
всякому словеси, / коварный же приходит в  
раскаяние. / Премудр убоясь уклонится от зла,  
/ безумный же на себе надеясь смешавается со  
беззаконным. / Острояростный без совета  
творит, / муж же мудрый многая терпит. /  
Разделяют безумнии злобу, / коварнии же  
удержат чувство. / Поползнутся злии пред  
благими, / и нечестивии послужат пред дверьми  
праведных. / Друзие возненавидят друзей  
убогих: / друзие же богатых мнози. / Безчестяй  
убогия согрешает, / милуяй же нищыя блажен. /  
Заблуждающии (неправедницы) делают злая, /  
милость же и истину делают благии. / Не ведут  
милости и веры делателие злых: / милостыни же  
и веры у делателей благих.

На литии стихиры, глас 6:

Иларионе, святителю Божий, / от скорби сердца  
твоего / принесл еси покаяние истинное, /  
супружницу и чада твоя окорив, / стезю  
иноческаго жития достойно прошел еси, / на

высоту орла поставлен быв, / во утихновение  
скорбящим и слезоточным, / обетование верным  
от Христа исполняя: / блаженни плачущии: //  
яко тии утешатся.

Иларионе, святителю тихий, / во смиренном  
житии твоём, / образ ко спасению быв /  
пастырем Полтавския земли, / и всем верным  
чадом твоим, / их же божественным законам  
поучая, / во Христе утвердил еси, /  
добродетельми украшая, / смиренномудрие  
насаждая, / ибо блажени кротцыи: // яко тии  
наследят землю.

Иларионе, святителю благостынный, /  
иночествующих и мирских пастырю мудрый, /  
ко спасительному подвигу нищелиюбия /  
подвизал еси всех, / сирья, вдовы и убогия, /  
яко богомданное сокровище возлюбив, /  
милосердию и любве, Христа ради, поучая, / ибо  
блажени милостивии: // яко тии помиловани  
будут.

Слава, глас 6:

Иларионе, святителю блаженне, / Христу всем  
сердцем прилепился еси, / ум свой во смирении  
соблюдая, / всякия добродетели  
преисполнишася, / в радость с Господем твоим  
возшел еси, / чистым сердцем / созерцая славу  
Триединого Божества, / моли о нас Превечнаго

Бога, / и нам причастниками быти Царства  
Небеснаго, // и блаженства улучшить.

И ныне, глас тойже:

Святейшую херувим / и вышшую серафим,  
Пречистая, / Богородицу Тя исповедующе  
грешнии, / прибегаем к покрову Твоему / во  
скорбех и печалех, / и не едины неутешени  
отходим, / прославляюще пречистаго лика  
Твоего изображения, / Ты бо всех скорбящих  
Радость / и Упование всех концов земли, / моли  
о нас Превечнаго Бога, / и нам причастниками  
быти Царства Небеснаго, // и блаженства  
улучити.

На стиховне стихиры, глас 2.

Подобен: ДOME Евфрафов:

Священне Иларионе, / архиерей божественный,  
/ пастырем образ богодарованный, / и людем  
всем предстателю, // прославися днесь  
всечесная память твоя.

Стих: Яко милость Твоя пред очима моима есть,  
/ и благоугодих во истине Твоей.

Церковь Русская / украшается днесь, / иноков  
соборы ликовствуют, / доблестнаго Илариона,  
ублажая, // святителя новаго.

Стих: Милость и истина сретостеса, / правда и  
мир облобызастеса.

Земле Полтавская, / собрание божественное, /

вонми подвигам святителя твоего, / нищелюбию  
и милости поучаяся, / в них же спасение бысть.

Слава, глас и подобен тойже:

Святителю отче Иларионе, / иерарше  
милостивый, / молися ко Господу, / о земном  
отечестве твоём, // и о почитающих тя  
любовию.

И ныне, глас и подобен тойже:

Вкупе со святителем милостивым, / Мати  
Христа Бога, / моли Всемилостиваго Спаса, / о  
мире Твоём, / и о почитающих Тя любовию.

По Ныне отпуцаеши: тропарь святому, глас 3:  
Иерархов образ тихости, / смирения наставниче  
/ и нищих заступниче, / не забуди чад твоих, /  
моля о нас Всещедраго Бога, / святителю  
Христов Иларионе, // милостивый отче наш.

## На утрени

По 1-м стихословии седален, глас 4:

Не таим, святителю милостивый Иларионе, /  
подвиг милосердия твоего, / яко богомудрый  
архиерей еси / явил себе земли Полтавския, / о  
ней же молися присно, / людем ея в мире  
пребывати // и по образу твоему спесение  
взыскати.

Слава, и ныне, Богородичен, глас тойже:  
Кто от мира сего / утаит, Пречистая, множество  
чудес Твоих, / от лика Твоего изображений / по  
всему лицу земли изливающихся / на  
богобоящихся людии, / их же в мире и  
благочестии / пребывати утверди // и Тобою  
спасение взыскати.

По 2-м стихословии седален, глас 5:  
Величаем днесь блаженную память твою, /  
святителю предивный Иларионе, / подражати  
дерзая / подвигам нищилюбия / и сердечного  
попечения о убогих, / в них же преуспел еси на  
земли, / на небесех в числе бессреббников вчинен  
ныне, / радости блаженныя причастниче, /  
моли Христа милостиваго Спаса, // помиловати  
души наша.

Слава и ныне, Богородичен, глас тойже:  
Величие твое днесь, Пречистая, / воспевают вси  
концы земли, / Ты бо еси по Бозе упование  
наше, / Пренепорчная Дево, / моли Христа  
милостиваго Спаса, // помиловати души наша.

#### Величание:

Величаем тя, / святителю милостивый  
Иларионе, / и чтим святую память твою, / ты бо  
молиши за нас // Христа Бога нашего.

### Псалом избранный:

Блажен муж, бояйся Господа, в заповедех Его восхощет зело. / Сильно на земли будет семя его, род правых благословится: / Слава и богатство в дому его, и правда его пребывает в век века. / Возсия во тме свет правым, милостив и щедр, и праведен. / Благ муж, щедря и дая: устроит словеса своя на суде, яко в век не подвижится. / В память вечную будет праведник. / От слуха зла не убоится, готово сердце его уповати на Господа. / Утвердися сердце его, не убоится, дондеже воззрит на враги своя. / Расточи, даде убогим, правда его пребывает во век века, рог его вознесется в славе. / Грешник узрит и прогневается, зубы своими поскрежещет и растает, желание грешника погибнет.

### По полиелеи седален, глас 6:

От юности последовал еси Христу, Иларионе, / святителю милоситвый, / страстей зломрадие разгоняя, / добродетели в сердце своем вкореняя усердно, / норочито же милосердие и ницилюбие, / в нихже преуспел еси. / Днесь бо блаженствуя в селениях праведных, / моли о нас Всемилоstitиваго Бога, / и нам в добродетелех укрепитесь // и спаситися душам нашим.

Слава и ныне, Богородичен, глас тойже:  
Пречистую Деву воспоем ныне, / людие  
Боголюбивии, / миру Спсение рождшую / и всех  
ко Христу перведшую, / Та бо наше упование /  
и в трудах милосердия помощница, / молится о  
нас усердно, // спастися душам нашим.

Степенна, 1-й антифон 4-го гласа.  
Прокимен, глас 1: Уста моя возглаголют  
премудрость, / и поучение сердца моего  
разум. Стих: Услышите сия, вси языцы,  
внушите, вси живуции по вселенней.

Евангелие от Матфея, зачало 43.

По 50-м псалме стихира, глас 6:  
Днесь да ублажим Илариона милостиваго, /  
святителя Полтавскаго, / славу Господню  
непрестанно возвещавшаго, / и благочестие  
правое по всюду насадившаго, / на лица  
человеков никогда же взиравшаго, / но  
любовию вся ко Христу преводившаго, // егоже  
Господь прослави во веки.

Канон святителю Илариону, епископу  
Полтавскому, егоже краегранесие: Илариона,  
новаго святителя восхвалим!

## Песнь 1

Ирмос: Помощник и Покровитель / бысть мне во спасение, / Сей мой Бог, / и прослаблю Его, / Бог Отца моего, / и вознесу Его: / славно бо прославися.

Илариона святителя Твоего, Господи, воспеваем днесь, / всечестную память прославляюще, / тому бо помощник и покровитель в житии бысть, / Троиединый Боже, / егоже на земли подвизал еси / славно славити Тя: / славно бо прославися.

Любовию воспевает тя ныне Церковь Божия, / милостивый святителю, / от земных в горнее свидетельствоваше преселение твое, / идеже в сонме святых предстоиши, / прославляя Отца, Бога нашего, / вознося Имя Его: / славно бо прославися.

Ангелов лица на Небеси ликовствуют, / земнороднии же радостию воспевают Всемилостиваго Спаса, / Егоже на земли прославляющи / в вечныя покои прешел еси, / святителю милостивый, / Господу поюще: / славно бо прославися.

Богородичен: Рождеством Твоим, Пренепорочная, / идольския прелести свободдшися, / светом невечерним Сына Твоего и Бога просвещаеми, / с Тобою вкупе дерзаем возносити Имя Его: / славно бо прославися.

### Песнь 3

Ирмос: Утверди, Господи, / на камени  
заповедей Твоих / подвигшееся сердце мое, /  
яко Един Свят еси и Господь.

Истины ревнитель издетска бысть, /  
премудрейший Иларионе, / на камени  
заповедей Христовых утвердил еси сердце твое,  
/ живот твой в Бозе полагая, / яко Един Свят  
еси и Господь.

Образ смиренного жития во Христе бысть от  
юности твоя, / святителю боголюбиве, / тя бо  
прославляет днесь Смоленская земля, / яко  
поросль свою до Неба возросшую, / Бога  
славословяще: / яко Един Свят еси и Господь.

Неведжества бегая, богомудре, / родителю  
своему Евфимию священнику, / в подвиге  
книжном подражати подщался еси, / во граде  
Вязьме / послежди во Смоленске учением  
Христовым, и молитвою / услаждал еси ум свой  
/ в Боге утверждаяся, / яко Един Свят еси и  
Господь.

Богородичен: Ангели с Небеси, радостию  
воспеша Тя, / Дево Мариам, / Божественный  
Свет зряще из чрева Твоего, род человечестий  
освещающий, / Христа прославляючи, / яко  
Един Свят еси и Господь.

### Седален, глас 1:

Святителю Иларионе, / Бога милостиваго  
подражателю, / во дни земнаго жития твоего, /  
всем к тебе приходящим благодворил еси, / вся  
на потребу подая, / ныне и нас, притекающих к  
тебе / не остави милостивым твоим оком, /  
взирая на нужды наша, / вся ны обогати якоже  
разсудиши, / да воспоем ти вси: // радуйся  
отче премилосерднейший Иларионе.

### Слава, и ныне, Богородичен:

Преблагословенная Дево, / Мати Христа Бога  
нашего, / на пире Канском умолила еси о чуде  
Сына Твоего, / из воды вино сотворити  
предивное, / тем бо начаток чудес положи  
Господь, / и ныне, молим Тя, Всепетая, /  
умилостиви Спаса нашего, / и нам на потребу  
довольствие даровати, / и от рук наших всякую  
милостыню прияти / убогим употребленную, /  
прославляющих Тя во веки.

### Песнь 4

Ирмос: Услыша пророк / пришествие Твое,  
Господи, / и убояся, / яко хочещи от Девы  
родиться / и человеком явиться, / и глаголаше:  
/ услышах слух Твой / и убояхся, / слава силе  
Твоей, Господи.

Надеяние велие возложиша на Господа /  
премудрый архипастырь Тимофей, / егда

дщерьшу свою / во супружицы тебе избра,  
христороубче, / и пророчествуя тя во пресвитеры  
Церковныя, / управити стопы твоя у Бога  
испроси: / слава силе Твоей, Господи.

Обрел еси милость Божию, иерее премудре, /  
егда образом благонравия и благоговения к  
службе Божией / людем веси Колковичи явился  
еси, / всякое небрежение к святыни упраздняя,  
/ единого Бога прославляя зовуще: / слава силе  
Твоей, Господи.

Верный ученик Христов быв, отче благообразне,  
/ николиже слово проповеди оставляя, /  
божественныя чада твоя сладости духовныя  
насыщал еси, / в мудрости прославляя Бога: /  
слава силе Твоей, Господи.

Богородичен: Адама новаго Мати, / двери  
райския нам отверзающаго, / почтим вернии, /  
чудо чудес Рождества Ея предивнаго воспевая, /  
оним бо сниде на землю Бог, / ад сокрушая и  
верныя свободя: / слава силе Твоей, Господи.

## Песнь 5

Ирмос: От ноци утренююща, Человеколюбче, /  
просвети, молюся, / и настави и мене / на  
повеления Твоя, / и научи мя Спасе, / творити  
волю Твою.

Горькия скорби претерпеша, священнейший  
отче, / во успении супружицы и дщери твоя, /

не ожесточил бо еси сердце твое, моляся: /  
научи мя Спасе, творити волю Твою.  
Объятия Своя отверзе тебе Отец всех,  
преподобне, / егда от мира приял еси сыны  
твоя, / в селениях праведных упокоевая, /  
подвизая тебе молитися усердно: / научи мя  
Спасе, творити волю Твою.

Сила Божия вседетельная / и мудрость  
всемогущая, / столп истины тя сотвори, / дом  
Духа Живаго содела тя, преподобне Иларионе, /  
рукама преосвященнаго Серафима / лику  
иночествующих сочета тя, поющаго: / научи мя  
Спасе, творити волю Твою.

Богородичен: Все роди земнии блажат Тя,  
Пренепорочная, / яко сотвори Тебе величие  
Сильный / и свято имя Твое бысть во веки, /  
тобою бо взываем ныне: / научи мя Спасе,  
творити волю Твою.

## Песнь 6

Ирмос: Возопих всем сердцем моим / к щедрому  
Богу, / и услыша мя от ада преисподняго, / и  
возведе от тли живот мой.

Яко добрый пастырь / во обитель Смоленскую  
Живоначальныя Троицы поставлен бысть над  
братией, / ко благолепию оной и умножению  
иночествующих / премного потрудился еси,  
преподобне, / благочинному житию многих

монахов подвижая, поющих: / возведи от тли,  
Господи, живот мой.

Тя, милостивый отче, / днесь отцы преподобнии  
Лавры Печерстей / в сомолитвенницы  
призывают, / яко мудраго наместника и монаха  
поминая, / труды и подвиги твоя  
прославляючи, / ныне всяк инок поет, тобою  
наставленный: / возведи от тли, Господи, живот  
мой.

Избрание твое, преславне, / во епископы  
Полтавския блаженный Паисий провозвести, /  
егда посох свой в десницу тебе вложи, лобызая  
ю / и святителем нарекая, / от Бога грядущая  
яко настоящая провидя, / чистым сердцем  
моляся: / возведи от тли, Господи, живот мой.

Богородичен: Тя бо пророки, Пречистая,  
провозвестиша издревле, / и Господь Купиною  
новою яви, / приемшую невместимаго Бога / и  
Рождшую Спасителя миру, / Ему же  
непрестанно всяк человек взывает: / возведи от  
тли, Господи, живот мой.

Кондак, глас 6:

Всемилоствиваго Спаса мудрый учениче, /  
благочестия ревнителю, / нищелюбием  
украшенный / и всякия добродели  
исполненный, / Преосвященных Полтавских  
славо, / монахом правило, мирским утешение, /

Иларионе, милостивый святителю, / моли  
Христа Бога нашего / о земном отечестве твоём  
// и нам, по образу твоему, спасение улучшить.

### Икос

Божественного разума исполнен весь, /  
святителю премудрый Иларионе, /  
божественныя чада своя поучая Писанию / и  
житию праведному во Христе Иисусе, / тихости  
и любви образ быв, / ныне же обетованной  
земли наследник явися по кротости сердца  
твоего, / и яко милостив быв ко всем, / от ныне  
слышиши, / со всеми святыми, / Спасителевы  
глаголы: / приидите, благословение Отца Моего,  
/ наследуйте уготованное вам Царство // от  
сложения мира. Аминь.

### Песнь 7

Ирмос: Согрешихом, беззаконновахом, /  
неправдовахом пред Тобою, / ниже соблюдохом,  
/ ниже сотворихом, / якоже заповедал еси нам;  
/ но не предаждь нас до конца, / отцев Боже.  
Единством Синода Церковнаго / избран бысть,  
блаженне, во епископское достоинство, / в  
соборе Пресвятыя Троицы града святаго Петра /  
хиротонисан быв премудрым Исидором; / град  
Полтаву пришествием возвеселил еси, / с  
божественною паствою моляся: / не предаждь

нас до конца, / отцев Боже.

Любовию распалем к чадом церковным / и  
братии обители Крестовоздвиженския, /  
равноапостольною благодатию учил еси вся, / ко  
благочестию, милости, / и любви к  
богослужению призывая, /  
законоучительствовати пастыри церковныя  
побуждая, / и вся людие к молитве наставляя: /  
не предаждь нас до конца, / отцев Боже.

Яви тебе Господь, милостиве отче, / угодники  
Своя, во обители Полтавстей почивающия в  
нетлении: / мудраго архиерея Амвросия / и  
печальника земли нашея святителя и  
чудотворца Афанасия, / их же подвигам чада  
божественныя укрепляя, / молитися подвизал  
еси: / не предаждь нас до конца, / отцев Боже.

Богородичен: Велию милость яви Тобою Господь,  
/ Преплагословенная Дево, / из Тебе бо пророк,  
/ яко дверем затворенным провидя Рождение  
Божие, / Той бо нам двери райския откры,  
поющим: / не предаждь нас до конца, / отцев  
Боже.

## Песнь 8

Ирмос: Егоже воинства небесная славят, / и  
трепещут Херувими и Серафими, / всяко  
дыхание и тварь, / пойте, благословите и  
превозносите во вся веки.

Образ милосердия земли полтавстей ты еси, священне Иларионе, / мнози бо о тебе благочестию поревноваша / во служении сирым, вдовам и убогим потщалися еси, / в сердцах благословяще / и превозносяще Бога во вся веки.

Сампсону Странноприимцу уподобился еси, милостиве, / братства и сестричества утверждая мнози, / во служение бедным и убогим, / в честь Пречистыя Владычицы Богородицы устроая оныя, / да храними Покровом Ея, / воспоют вси: / благословите и превозносите Бога во вся веки.

Христов ученик премудрейший явился еси, / святителю предивне, / поучая божественныя чада твоя, / монахи и мирстии, / собирать сокровища на небесех, / ближних своих никогдаже отвергати, / слава и превознося имя Господне во вся веки.

Богородичен: Владычице Препоблагословенная, / неоскудны токи милосердия Твоего, / всем с верою призывающим Тя, / не отврати от нас Пречистаго лика Твоего, / но моли и нам желаемых благ причастниками быти, / радостию зовуще: / пойте, благословите / и превозносите Бога во вся веки.

## Песнь 9

Ирмос: Безсеменнаго зачатия / рождество  
несказанное, / Матере безмужныя / нетленен  
Плод, / Божие бо Рождение / обновляет  
естества. / Темже Тя вси роди, / яко  
Богоневестную Матерь, / православно величаем.  
Ангелоподобной чистоте души твоея дивимся, /  
святителю Христов, / поминаючи предивное  
исцеление твое, / от иконы Пресвятыя  
Богородицы, всех скорбящих Радосте,  
именуемой. / Днесь прославляще тя, / с  
Пречистою Девою православно величаем.  
Лику святых сопричтеннаго, / отче милосердне,  
почитаем, / поминающе многотрудное житие  
твое, / яко в земная сниде, / духом в Небесныя  
достиже, / путеводя ко Христу божественныя  
чада твоя, / неизреченныя милости низпосылая  
/ предстательством пред Богом, / Егоже Имя  
ныне православно величаем.  
Исходу твоему / от земных во обители райския  
уготова себе, / пастырю милостиве, рекоша: /  
простите чада моя возлюбленная, / поминая  
любившаго вы до скончания живота; / днесь  
предстояще раце мощей твоих / о сем же  
моляще тя, / православно величаем.  
Богородичен: Милостиваго Бога / Благоутробная  
Мати, / Дево Пренепорочная, / спасение миру  
даровала еси Рождеством Твоим, / от пагубы

древняя избавляя. / Темже Тя вси роди, / яко  
Богоневестную Матерь, / православно величаем.

### Светилен

Дебелых сердец и умов наших превозношение, /  
посрамление ты еси, святителю Христов, / в  
житии твоём многими бо добродетельми  
украшен быв, / душу свою в любви и  
милосердии соблюдая / возшел еси от земных в  
горнее / идеже радость и веселие всем любящим  
Господа / и творящим волю Его. / Просим  
днесь: / умягчи сердца наши / и ум наш в  
добродетели утверди, / моляся о всех нас, //  
Иларионе, милостивый отче наш.

Слава, и ныне, Богородичен:

Сердец злых умягчение, / именуем Тя,  
Богородице, / и молимся Тебе, /  
предстательством Твоим у Господа, / отврати от  
нас злыя обычаи мира сего, / и всякое  
нерадение о ближних, / но в нищелюбии и  
милосерди утверди сердца наши, //  
воспевающия Тя, Пренепорочная.

На хвалитех стихиры, глас 5:

Хваление приносим днесь Богу, / явившему  
Церкви Своей молитвенника новаго, /  
Илариона, святителя Полтавскаго, / егоже  
избрал еси во служении Себе, / знаменьями и

чудеса утверждая, / указующе путь  
спасительный / во обители вечныя, / идеже  
днесь во славе пребывает, // славословие  
приносяще Господеви во веки.

Хваление приносим днесь Богови, / от  
иноческаго чина, / блаженне Иларионе, /  
избравшего тя / на служение Церкви Своей, /  
апостольския благодати уготовав венец, / егоже  
провидя преподобный Паисий, / исповеда тя  
святителем новым Полтавския земли, / во  
укрепление жезла архиерейского в руке твоей, /  
на спасительныя пажити / водити  
божественныя чада твоя, // славословие  
приносяще Господеви во веки.

Хваление приносим днесь Богови, / явившего  
тебе, / милостивый архиерее Божий Иларионе, /  
молитвенников новых Полуденной Руси, / града  
Полтавы предивных чудотворцев, / святителя  
многоскорбнаго Афанасия / и богомудраго  
Амвросия, епископа, / их же имена во Христе  
возвеличил еси, / днесь бо оныя ублажают тя / у  
Престола Вседержителя, / с тобою вкупе //  
славословие приносяще Господеви во веки.

Хваление приносим днесь Богови, / о пречудном  
исцелении твоём, / Иларионе божественне, / от  
иконы Пречистыя Богоматери, / всех скорбящих  
Радосте, именуемой, / пред той бо молился еси  
усердно / в сомолитвенницы пред Богом /

призывая Деву Пренепорочную / с Нею же  
днесь у в Престола Горнего предстоя /  
ходатайствуй о всех нас, / недугов наших  
исцелитесь, / страстей очиститися / и  
достойными Царства Небеснаго стати, //  
славословие приносяще Господеви во веки.

Слава, глас 3:

Днесь святитель Иларион предстоит Богу / и за  
ны молится усердно, / во обители Полтавстей  
почивая / богоблагодатными мощами, /  
призывая возлюбленные чада своя. / О,  
милостивый святителю, / не забуди нас пред  
Господем, поминая нас, / да презрит яко Благ,  
прегрешения наша, / да обрящем милость на  
судище страшнем, / и с тобою прославим Бога  
во веки. // Помяни нас, отче, возлюбившия тя.

И ныне, Богородичен.

Славословие великое и отпуст.

